

Na osnovu člana 28. Zakona Bosne i Hercegovine o izvršenju krivičnih sankcija, pritvora i drugih mjera («Službeni glasnik BiH», broj 13/05), ministar pravde Bosne i Hercegovine d o n o s i

P R A V I L N I K
O SADRŽAJU I OBRASCU SLUŽBENE LEGITIMACIJE
OVLAŠTENIH ZAVODSKIH SLUŽBENIKA U ZAVODIMA
ZA IZVRŠENJE KRIVIČNIH SANKCIJA PRITVORA
I DRUGIH MJERA BOSNE I HERCEGOVINE

Član 1.

Ovim pravilnikom uređuje se sadržaj i obrazac službene legitimacije (u daljem tekstu: legitimacija) ovlaštenih zavodskih službenika (u daljem tekstu: korisnik legitimacije) u Zavodima za izvršenje krivičnih sankcija, pritvora i drugih mjera Bosne i Hercegovine (u daljem tekstu: Zavod) i izdavanje, zamjena i vođenje evidencije o izdatim legitimacijama.

Član 2.

Legitimacija se izdaje korisniku legitimacije sticanjem svojstva ovlaštenog zavodskog službenika.

Član 3.

(1) Legitimacija služi korisniku legitimacije za dokazivanje njegove službene dužnosti i da ima prava i dužnosti utvrđene zakonom.

(2) Korisnik legitimacije dužan je nositi legitimaciju za vrijeme vršenja službene dužnosti i pokazati je prilikom obavljanja službenih poslova za koje je zakonom ovlašten.

Član 4.

(1) Legitimacija se izrađuje na punom papiru, oblika pravougaonika, dimenzija 90 mm x 55 mm, sivo-bijele boje u čijoj je sredini s obje strane utisnut znak zavodske policije, zaštićen omotom od prozirne mase, otpornim na mehanička, hemijska i toplotna djelovanja.

(2) Prednja strana legitimacije sadrži:

- a) grb Bosne i Hercegovine,
- b) naziv Bosna i Hercegovina, Ministarstvo pravde, Zavodska policija,
- c) ime i prezime korisnika legitimacije,
- d) dužnost koju obavlja korisnik legitimacije,
- e) jedinstveni matični broj građana (JMBG) korisnika legitimacije,
- f) serijski broj legitimacije i
- g) fotografiju korisnika legitimacije.

(3) Na poledini legitimacije odštampana su sljedeća ovlaštenja korisnika legitimacije:

«Na osnovu čl. 26. do 38. Zakona Bosne i Hercegovine o izvršenju krivičnih sankcija, pritvora i drugih mjera («Službeni glasnik BiH», broj 13/05), lice na koje glasi ova službena legitimacija ovlašteno je nositi uniformu i oružje, čuvati i sprovoditi zatvorenike i pritvorenike, ući u stan i druge prostorije radi pronalaženja i hvatanja odbjeglih lica, upotrijebiti sredstva prinude, sredstva veze, saobraćajna sredstva, vatreno oružje i druga sredstva predviđena Zakonom».